



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք.Երևան

09.03.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ 23/17

ՀՀ գնումների բողոքարկման խորհրդի (այսուհետ նաև՝ Խորհուրդ) բողոքը քննող հանձնաժողովը՝ գործելով Խորհրդի անունից, քննելով «Յուքոմ» ՍՊԸ-ի կողմից 16.02.2017թ. ներկայացված բողոքը (այսուհետ նաև՝ ԳԲԽ-23/17 ծածկագրով բողոք) և կից ներկայացված փաստաթղթերը, ինչպես նաև «Գնումների աջակցման կենտրոն» ՊՈԱԿ-ի կողմից (այսուհետ նաև՝ Կենտրոն) 03.03.2017թ. ներկայացված եզրակացությունը, պարզել է հետևյալը.

1. «Յուքոմ» ՍՊԸ-ի կողմից ներկայացված փաստերը, հիմնավորումներն և պահանջը.

«Յուքոմ» ՍՊԸ-ն (այսուհետ նաև՝ Ընկերություն) 16.02.2017թ. ներկայացված բողոքով հայտնել է, որ մասնակցել է ՀՀ տրանսպորտի, կապի և տեղեկատվական տեխնոլոգիաների նախարարության (այսուհետ նաև՝ Պատվիրատու) կողմից հեռախոսակապի ծառայությունների ձեռքբերման նպատակով կազմակերպված «ՏԿՆ-ՇՀԾԶԲ-15/28-1/2017» ծածկագրով շրջանակային համաձայնագրերի միջոցով գնում կատարելու ընթացակարգին (այսուհետ նաև՝ Ընթացակարգ):

Ներկայացված հայտերի գնահատման արդյունքում գնահատող հանձնաժողովի 01.02.2017թ. ժամը 11:00-ի նիստի թիվ 7 արձանագրության համաձայն՝ ճանաչվել է մրցույթի 1-ին տեղ զբաղեցրած մասնակից: Նշված արձանագրությունը պատշաճ կերպով ուղարկվել է «Յուքոմ» ՍՊԸ-ին:

Այնուհետև, անհասկանալի պատճառներով 14.02.2017թ.-ի ժամը 10:00-ի նիստի թիվ 6 արձանագրությամբ Պատվիրատուն անհիմն կարգով հայտը չեղյալ է ճանաչել:

Ըստ Պատվիրատուի՝ Ընկերության կողմից թույլ է տրվել խախտում, այն է՝ «Յուքոմ» ՍՊԸ-ի կողմից ստորագրված պայմանագրում բացակայում է սարքերի անվանումները և տեխնիկական բնութագրերը, սակայն հրավերի մեջ չի եղել սարքերի հստակ նկարագրության պահանջ:

Ընկերությունը հայտնում է, որ իր անիրաավաչափ որոշումը գնահատող հանձնաժողովը կայացրել է՝ հիմք ընդունելով և սխալ մեկնաբանելով ՀՀ կառավարության «Գնումների գործընթացի մասին» 168-Ն որոշմամբ հաստատված կարգի 44-րդ հոդվածի 4-րդ կետը, այն է՝ «հայտերի բացման նիստում հանձնաժողովը մերժում է այն հայտերը, որոնցում բացակայում են հրավերի պահանջներին համապատասխան ներկայացված գնային առաջարկը կամ հայտի ապահովումը»:

Ընկերությունը նշել է, որ գնահատող հանձնաժողովն թիվ 6 արձանագրությամբ մերժել է «Յուքոմ» ՍՊԸ-ի հայտը ոչ թե հայտերի բացման նիստում, ինչպես նախատեսված է ՀՀ կառավարության «Գնումների գործընթացի մասին» 168-Ն որոշմամբ հաստատված կարգով, այլ անհասկանալի և գործող օրենսդրությամբ չնախատեսված կարգով՝ 2-րդ նիստի շրջանակներում, որը տեղի է ունեցել 14.02.2017թ.-ին:

Բողոքաբերը նշել է, որ «Յուքոմ» ՍՊԸ-ի կողմից գնային առաջարկը ներկայացվել է հրավերի պահանջներին համապատասխան, քանի որ հրավերով սահմանված բոլոր անհրաժեշտ փաստաթղթերը ներկայացվել են:

Ընկերությունը պահանջում է չեղյալ հայտարարել 14.02.2017թ. թիվ 6 արձանագրությունը և պարտավորեցնել Պատվիրատուին կնքել համապատասխան պայմանագիր «Յուքոմ» ՍՊԸ-ի հետ:

Ընկերությունը բողոքին կից ներկայացրել է թիվ 6 և թիվ 7 արձանագրությունների պատճենները և Ընթացակարգին վերաբերող այլ փաստաթղթերի պատճեններ:

«Գնումների աջակցման կենտրոն» ՊՈԱԿ-ում ԳԲԽ-23/17 ծածկագրով բողոքի քննության շրջանակներում 22.02.2017թ. ժամը 16:30-ին տեղի ունեցած բողոքը քննող հանձնաժողովի նիստին «Յուքում» ՍՊԸ-ի ներկայացուցիչը պնդեց բողոքով ներկայացված դիրքորոշումը:

2. ՀՀ տրանսպորտի, կապի և տեղեկատվական տեխնոլոգիաների նախարարության կողմից բողոքի վերաբերյալ ներկայացված փաստերը, հիմնավորումներն և դիրքորոշումը.

Կենտրոնը 17.02.2017թ. թիվ 01/04-1/534-17 գրությամբ դիմել է ՀՀ տրանսպորտի, կապի և տեղեկատվական տեխնոլոգիաների նախարարությանը և խնդրել է եռօրյա ժամկետում ներկայացնել «ՏԿՆ-ՇՀԾՁԲ-15/28-1/2017» ծածկագրով շրջանակային համաձայնագրերի միջոցով գնում կատարելու ընթացակարգին վերաբերող բոլոր անհրաժեշտ փաստաթղթերի պատճենները և տալ կարծիք:

23.02.2017թ. թիվ 09/16-1/2587-17 գրությամբ ՀՀ տրանսպորտի, կապի և տեղեկատվական տեխնոլոգիաների նախարարությունը հայտնել է, որ ՀՀ տրանսպորտի, կապի և տեղեկատվական տեխնոլոգիաների նախարարության կարիքների համար՝ հեռախոսակապի ծառայությունների ձեռքբերման նպատակով «ՏԿՆ-ՇՀԾՁԲ-15/28-1/2017» ծածկագրով հայտարարված շրջանակային համաձայնագրերի միջոցով գնում կատարելու ընթացակարգին մասնակցել են «Յուքում» ՍՊԸ-ն և «ԱրմենՏել» ՓԲԸ-ն:

Գնահատող հանձնաժողովի 01.02.2017թ. նիստի արձանագրությամբ չեղյալ է հայտարարվել 01.02.2017թ. գնահատող հանձնաժողովի որոշումը և որոշվել է առաջարկել մասնակիցներին ներկայացնել տեղեկատվություն առաջարկվող սարքերի անվանումների և տեխնիկական բնութագրերի վերաբերյալ:

«Յուքում» ՍՊԸ-ի կողմից 16.02.2017թ. էլեկտրոնային գրությամբ ներկայացվել է համապատասխան տեխնիկական սարքավորումների անվանումները, սակայն վերջինիս կողմից նույն օրը չեղարկվել է ներկայացված նամակը:

Պատվիրատուն գտնում է, որ ներկայացված բողոքը անհիմն է, քանի որ գնահատող հանձնաժողովը «Յուքում» ՍՊԸ-ի կողմից ներկայացված հայտը չի մերժել, այլ

առաջարկություն է ներկայացվել տրամադրել տեղեկատվություն՝ սարքերի անվանումների և տեխնիկական բնութագրերի վերաբերյալ:

27.02.2017թ. թիվ 09/15.3/2818-17 գրությամբ Պատվիրատուն Կենտրոնին է հայտնել, որ «ՏԿՆ-ՇՀԾՁԲ-15/28-1/2017» ծածկագրով հայտարարված շրջանակային համաձայնագրերի միջոցով գնում կատարելու ընթացակարգի գնահատող հանձնաժողովը, ուսումնասիրելով 23.02.2017թ. «Գնումների աջակցման կենտրոն» ՊՈԱԿ-ի թեժ գծով ստացված բողոքը, պարզել է, որ ՀՀ տրանսպորտի, կապի և տեղեկատվական տեխնոլոգիաների նախարարության կողմից հայտարարված ընթացակարգի հրավերի տեխնիկական բնութագրով ամբողջությամբ և հստակ նկարագրված չէ ձեռքբերվող ապրանքը, որը կարող էր պատճառ հանդիսանալ այլընտրանքային մեկնաբանությունների:

Պատվիրատուն նշել է, որ չի պահպանվել «Գնումների մասին» ՀՀ օրենքի 12-րդ հոդվածի պահանջները:

Հիմք ընդունելով «Գնումների մասին» ՀՀ օրենքի 35-րդ հոդվածի 1-ին կետի 4-րդ ենթակետը՝ գնահատող հանձնաժողովը 24.02.2017թ. թիվ 8 արձանագրությամբ որոշել է ՀՀ տրանսպորտի, կապի և տեղեկատվական տեխնոլոգիաների նախարարության կողմից հայտարարված «ՏԿՆ-ՇՀԾՁԲ-15/28-1/2017» ծածկագրով շրջանակային համաձայնագրերի միջոցով գնում կատարելու ընթացակարգը հայտարարել չկայացած:

Պատվիրատուն Կենտրոնին է տրամադրել Ընթացակարգին վերաբերող բոլոր անհրաժեշտ փաստաթղթերի պատճենները:

Պատվիրատուն 27.02.2017թ. թիվ 09.15.3/2818-17 գրությամբ՝ ի պատասխան Կենտրոնի 23.02.2017թ. գրության, Կենտրոնի թեժ գծին 23.02.2017թ. ժամը 12:27-ին ստացված ահազանգի վերաբերյալ հայտնել է, որ համաձայն Ընթացակարգի գնահատող հանձնաժողովի 24.02.2017թ. ժամը 14:00-ին տեղի ունեցած նիստի թիվ 8 արձանագրության՝ գնահատող հանձնաժողովը, ուսումնասիրելով 23.02.2017թ.-ին Կենտրոնի թեժ գծով ստացված բողոքը, պարզել է, որ Ընթացակարգի հրավերի տեխնիկական բնութագրով ամբողջությամբ և հստակ նկարագրված չէ ձեռքբերվող ապրանքը, որը կարող էր պատճառ հանդիսանալ այլընտրանքային մեկնաբանությունների: Հիմք ընդունելով Օրենքի 35-րդ հոդվածի 1-ին կետի 4-րդ ենթակետը՝ Պատվիրատուն Ընթացակարգը հայտարարել է չկայացած:

«Գնումների աջակցման կենտրոն» ՊՈԱԿ-ում ԳԲԽ-23/17 ծածկագրով 22.02.2017թ. ժամը 16:30-ին տեղի ունեցած բողոքը քննող հանձնաժողովի նիստին ՀՀ տրանսպորտի, կապի և տեղեկատվական տեխնոլոգիաների նախարարության ներկայացուցիչը չի ապահովել իր մասնակցությունը, սակայն պատշաճ ծանուցված է եղել նիստի անցկացման օրվա և ժամի վերաբերյալ:

3. ԳԲԽ-23/17 ծածկագրով բողոքի վերաբերյալ «Գնումների աջակցման կենտրոն» ՊՈԱԿ-ի դիրքորոշումը.

Կենտրոնը Խորհրդին է ներկայացրել իր 03.03.2017թ. եզրակացությունն և առաջարկել է «Յուքոմ» ՍՊԸ-ի կողմից ներկայացված բողոքը մերժել:

4. ԳԲԽ-23/17 ծածկագրով բողոքի քննության համար էական նշանակություն ունեցող փաստերը.

ԳԲԽ-23/17 ծածկագրով բողոքի քննության համար էական նշանակություն ունեն հետևյալ փաստերը.

1. ՀՀ տրանսպորտի, կապի և տեղեկատվական տեխնոլոգիաների նախարարության կարիքների համար հեռախոսակապի ծառայությունների ձեռքբերման նպատակով «ՏԿՆ-ՇՀԾՁԲ-15/28-1/2017» ծածկագրով հայտարարված շրջանակային համաձայնագրերի միջոցով գնում կատարելու ընթացակարգին մասնակցելու նպատակով հայտ է ներկայացրել «Յուքոմ» ՍՊԸ-ն:

2. Գնահատող հանձնաժողովի 23.01.2017թ. որոշմամբ առաջին տեղ զբաղեցնող մասնակից է ճանաչվել «Յուքոմ» ՍՊԸ-ն՝ Ընթացակարգի 1-4-րդ և 6-րդ չափաբաժինների մասով:

3. 24.01.2017թ.-ին Պատվիրատուն Մասնակցին առաջարկել է երեք աշխատանքային օրվա ընթացքում ներկայացնել «Յուքոմ» ՍՊԸ-ի որակավորման չափանիշները հիմնավորող՝ հրավերով նախատեսված փաստաթղթերը:

4. Համաձայն գնահատող հանձնաժողովի 01.02.2017թ. որոշման՝ «Յուքոմ» ՍՊԸ-ն ճանաչվել է ընտրված մասնակից:

5. 07.02.2017թ.-ին Պատվիրատուն Մասնակցին հայտնել է, որ Ընթացակարգի 1-4-րդ և 6-րդ չափաբաժինների մասով ընտրված մասնակից է ճանաչվել «Յուքոմ» ՍՊԸ-ն, ներկայացրել է հեռախոսակապի ծառայությունների ձողքերման թիվ ՏԿՆ-ՇՀԾՁԲ-15/28-1/2017 պայմանագրի նախագիծը և առաջարկել է հինգ օրվա ընթացքում կնքել այն, ինչպես նաև ներկայացնել պայմանագրի ապահովումը՝ տուժանքի ձևով:

6. 14.02.2017թ.-ին Պատվիրատուն Ընկերությանը տեղեկացրել է, որ Ընթացակարգի գնահատող հանձնաժողովի 14.02.2017թ. որոշման համաձայն՝ չեղյալ է հայտարարվել գնահատող հանձնաժողովի 01.02.2017թ. որոշումը՝ Ընթացակարգի 2-4-րդ չափաբաժինների մասով լրացուցիչ պարզաբանում ստանալու հիմքով: Նույն գրությամբ Պատվիրատուն Ընկերությանը առաջարկել է երեք աշխատանքային օրվա ընթացքում ներկայացնել պարզաբանում «Յուքոմ» ՍՊԸ-ի կողմից Ընթացակարգի 2-4-րդ չափաբաժինների մասով ներկայացված սարքերի անվանումների և տեխնիկական բնութագրերի վերաբերյալ:

7. 23.02.2017թ. ժամը 12:27-ին Կենտրոնը թեժ գծով ահազանգ է ստացել, առ այն որ Պատվիրատուի կողմից հայտարարված Ընթացակարգի հրավերի տեխնիկական բնութագրով պարզ չէ, թե Պատվիրատուին ինչ ապրանքատեսակ էր անհրաժեշտ, ինչը խոչընդոտ է հանդիսացել Ընկերության մասնակցության համար:

Ահազանգողը խնդրել է Պատվիրատուին Ընթացակարգը հայտարարել չկայացած, քանի որ խախտվել են Օրենքի 12-րդ հոդվածի պահանջները:

8. Կենտրոնը 23.02.2017թ.-ին էլեկտրոնային եղանակով դիմել է Պատվիրատուին՝ խնդրելով կարծիք ներկայացնել Կենտրոնի թեժ գծին 23.02.2017թ. ժամը 12:27-ին ստացված ահազանգի վերաբերյալ:

9. Ի պատասխան վերոնշյալ գրությանը՝ Պատվիրատուն 27.02.2017թ. թիվ 09.15.3/2818-17 գրությամբ հայտնել է, որ համաձայն Ընթացակարգի գնահատող հանձնաժողովի 24.02.2017թ. ժամը 14:00-ին տեղի ունեցած նիստի թիվ 8 արձանագրության՝ գնահատող հանձնաժողովը, ուսումնասիրելով 23.02.2017թ.-ին Կենտրոնի թեժ գծով ստացված բողոքը, պարզել է, որ Ընթացակարգի հրավերի տեխնիկական բնութագրով ամբողջությամբ և հստակ նկարագրված չէ ձեռքբերվող ապրանքը, որը կարող էր պատճառ հանդիսանալ այլընտրանքային մեկնաբանությունների: Հիմք ընդունելով Օրենքի 35-րդ

հոդվածի 1-ին կետի 4-րդ ենթակետը՝ Պատվիրատուն ***Ընթացակարգը հայտարարել է չկայացած:***

10. Ընթացակարգը չկայացած հայտարարելու մասին համապատասխան որոշումը հրապարակված է www.gnumner.am կայքում:

5. ԳԲԽ-23/17 ծածկագրով բողոքը քննող հանձնաժողովի հիմնավորումներն և եզրահանգումը.

Խորհուրդն, ուսումնասիրելով «Յուքոմ» ՍՊԸ-ի կողմից 16.02.2017թ. ներկայացված բողոքն և կից փաստաթղթերը, ՀՀ տրանսպորտի, կապի և տեղեկատվական տեխնոլոգիաների նախարարության 23.02.2017թ. թիվ 09/16-1/2587-17 և 27.02.2017թ. թիվ 09/15.3/2818-17 գրությունները և կից փաստաթղթերը, գտնում է, որ «Յուքոմ» ՍՊԸ-ի կողմից ներկայացված բողոքն ենթակա է մերժման, հետևյալ պատճառաբանությամբ.

«Իրավական ակտերի մասին» ՀՀ օրենքի 86-րդ հոդվածի 1-ին մասի համաձայն՝ իրավական ակտը մեկնաբանվում է դրանում պարունակվող բառերի և արտահայտությունների տառացի նշանակությամբ՝ հաշվի առնելով օրենքի պահանջները:

Օրենքի 3-րդ հոդվածի 2-րդ մասի 1-ին կետի համաձայն՝ գնումների գործընթացը հիմնվում է գնման գործընթացի միասնական կանոններով, մրցակցային, թափանցիկ, հրապարարակային և ոչ խտրական հիմունքներով կազմակերպման սկզբունքի վրա:

Օրենքի 31-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Օրենքի 48-րդ հոդվածի 6-րդ կետի 2-րդ ենթակետի համաձայն՝ Խորհուրդն իրավունք ունի դադարեցնելու գնումների ընթացակարգի ընթացքում պատվիրատուի կամ գնահատող հանձնաժողովի կայացրած առանձին որոշումներ, այդ թվում՝ Օրենքի 9-րդ հոդվածով նախատեսված անգործության ժամանակահատվածում պայմանագիր կնքելու մասին որոշումը:

23.02.2017թ. ժամը 12:27-ին Կենտրոնը թեժ գծով ահազանգ է ստացել, առ այն որ ՀՀ տրանսպորտի, կապի և տեղեկատվական տեխնոլոգիաների նախարարության կողմից «ՏԿՆ-ՇՀԾՁԲ-15/28-1/2017» ծածկագրով ընթացակարգի հրավերի տեխնիկական բնութագրով պարզ չէ, թե Պատվիրատուին ինչ ապրանքատեսակ էր անհրաժեշտ, ինչը խոչընդոտ է հանդիսացել Ընկերության մասնակցության համար:

Ահազանգողը խնդրել է Պատվիրատուին Ընթացակարգը հայտարարել չկայացած, քանի որ խախտվել են Օրենքի 12-րդ հոդվածի պահանջները:

Կենտրոնը 23.02.2017թ.-ին էլեկտրոնային եղանակով դիմել է Պատվիրատուին՝ խնդրելով կարծիք ներկայացնել Կենտրոնի թեժ գծին 23.02.2017թ. ժամը 12-27-ին ստացված ահազանգի վերաբերյալ:

Պատվիրատուն 27.02.2017թ. գրությամբ, ի պատասխան Կենտրոնի թեժ գծին ստացված ահազանգի, հայտնել է, որ Ընթացակարգի գնահատող հանձնաժողովը, ուսումնասիրելով 23.02.2017թ. Կենտրոնի թեժ գծով ստացված բողոքը, պարզել է որ Ընթացակարգի հրավերի տեխնիկական բնութագրով ամբողջությամբ և հստակ նկարագրված չէ ձեռքբերվող ապրանքը, որը կարող էր պատճառ հանդիսանալ այլընտրանքային մեկնաբանությունների, քանի որ չէին պահպանվել Օրենքի 2-րդ հոդվածի պահանջները:

Հիմք ընդունելով Օրենքի 35-րդ հոդվածի 1-ին կետի 4-րդ ենթակետը՝ գնահատող հանձնաժողովը 24.02.2017թ. թիվ 8 արձանագրությամբ որոշել է Ընթացակարգը հայտարարել չկայացած:

Կենտրոնի կողմից կատարված ուսումնասիրության արդյունքում պարզվել է, որ Ընթացակարգը չկայացած հայտարարելու մասին համապատասխան որոշումը հրապարակված է նաև www.gnumner.am կայքում:

Այսպիսով, հաշվի առնելով Ընթացակարգը չկայացած հայտարարելու վերաբերյալ գնահատող հանձնաժողովի 24.02.2017թ. որոշումը՝ Խորհուրդը գտնում է, որ «Յուքոմ» ՍՊԸ-ի կողմից 16.02.2017թ. ներկայացված բողոքը՝ Ընթացակարգը չկայացած հայտարարված լինելու պայմաններում, դարձել է առարկայազուրկ և հնարավոր չէ բավարարել այդ բողոքով ներկայացված պահանջը:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 5-րդ մասով՝ ՀՀ գնումների բողոքարկման խորհուրդն՝

Ո Ր Ո Շ Ե Ց

«Յուրոմ» ՍՊԸ-ի կողմից 16.02.2017թ. ներկայացված բողոքը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումն կարող է բողոքարկվել դատական կարգով:

ԳԲԽ-23/17 ծածկագրով բողոքը քննող հանձնաժողովի՝

նախագահ՝  Գ. Հայրապետյան

անդամ



Հ. Մնացականյան